

**ՀԵՐՈՍԱԿԱՆԸ ԵՎ ՈՂԲԵՐԳԱԿԱՆԸ ԱՎԵՏԻՍ
ԱՅԱՐՈՆՅԱՆԻ «ԱԶԱՏՈՒԹՅԱՆ ՃԱՆԱՊԱՐՀԻՆ»
ԺՈՂՈՎԱԾՈՒԻ ՄԻ ՔԱՆԻ ՊԱՏՄՎԱԾՔՆԵՐՈՒՄ**

Ավետիս Ահարոնյանի/1866-1948/ «Ազատության ճանապարհին»/1906/ ժողովածուի մեջ գետեղված ստեղծագործությունների մեծ մասն հղացվել և գրականացվել են վավերական մյուսի և գրողի գաղափարական-գեղագիտական ուրույն մոտեցումների ուղրտներում: Արձակագրի հոգեկերտվածքի, կենսափիլիսոփայության և 19-րդ դ. վերջի ու 20-րդ դ. սկզբի՝ արևմտահայության կացության ու ճակատագրի թելադրանքով՝ նրա գեղագիտական աշխարհայեցության մեջ գերակայում են հատկապես հերոսականի և ողբերգականի սկզբունքները: Գեղագիտության հիշյալ եզրերի տիրույթներում ընդգրկված երևույթները հոգեհարազատ են նեոռոմանտիկ Ահարոնյանի գեղարվեստական մտածողությանն՝ ընդհանրապես ու ժողովածուի կերպարներից շատերին՝ մասնավորապես: Մեզ համար ընդունելի է այն պատկերացումը, ըստ որի՝ գեղագիտական մյուս հասկացությունների պես «մարդկային գիտակցության և կեցության այս ֆենոմենները կարելի է անվանել նաև աշխարհայացքային /կամ աշխարհայեցության տեսանկյունից նշանակալի/ զգացմունքներ, որոնք գոյություն ունեն արվեստում որպես հեղինակի, կամ կերպարների /պատկերված դեմքերի/ «սեփականություն»: Նման զգացմունքները միախուլված են կենսական որոշակի տեսակի երևույթների և մարդկանց ու նրանց խմբերի արժեքային կողմնորոշումների հետ: Սրանք առաջանում են այդ կողմնորոշումներից և մարմնավորում դրանք»:

1890-900-ական թթ. հայդուկային ազատագրական կռիվներն իրենց բուն քատերաքենում՝ Արևմտահայաստանի գավառներում, պատկերելիս Ահարոնյանն իրողությունները և նրանց գեղագիտական, աշխարհայացքային արժեք ունեցող զգացմունքային զնահատականը տալիս իր ուշադրությունը բևեռել է հիմնականում այս երկու եզրերով սահմանված երևույթների շփման ու միա-
հյուսման վրա:

Օսմանյան կայսրության հայահալած քաղաքականության դեմ անհավասար պայքարում հայդուկները ծեռք էին բերում բարոյական ու հոգեբանական բացառիկ հատկանիշներ՝ անհատական ու խմբային հերոսությունը զուգակցելով աներևակայելի, տիտանական թվացող կամային ուժի, համառության ու տոկունության հետ: Նրանց պայքարը գիրկընդխառն էր ընթանում իմաստավորված, խիզախ ու անձնագոհ արարքների տիրույթներում: Հիշյալ տարիներին, առանձին դեպքերում տղամարդկանցից շատերին արժանի պահվածքով են

հանդես եկել նաև արևմտահայ կինն ու պատանին: Վերջիններիս մեջ հայ մարդու պատվախնդիր, ազատատենչ ու համարձակ ոգին, թուրք ու քուրդ ջարդարարների դեմ նրանց ցուցադրած դիմադրությունն ու ընդվզումը յուրօրինակ դրսևորումներով է Ա.Ահարոնյանը պատկերել ժողովածուի «Ջավոն»/1899/, «Վազրիկ» /1904/ և «Հազրեմ» /1905/ պատմվածքներում:

«Ջավոն» պատմվածքում արևմտահայ իրականության համար սովորական թվացող ֆարուլան ու ավանդական գրական հորինվածքը նպատակաաւացորեն են հակադրված բովանդակության փիլիսոփայական ենթիմաստին: Այստեղ անտիկ դիցաբանությունից դեռևս ծանոթ ներդաշնակ, անճմալորված կոսմոսի մասին պատկերացմանը հակադրվում է մարդկային հասարակության ստեղծած քառսը, որն այս դեպքում առաջացել էր թուրք իշխողների նախաձեռնությամբ: Վաճա լճի խաղաղ բնակարով են շրջանակված պատմվածքի դրամատիկ, ողբերգական ու հերոսական դրվագները: Ափամերծ գյուղը մտած տաճիկ հարկահաններից խույս տալու նպատակով գեղջկուհի Ջավոն և նրա հարսը՝ Հեղինարը, գիշերվա մթության մեջ, նավակով փախուստի են դիմում: Նրանց, դժբախտաբար, չի հաջողվում ազատվել հարկահավաքներին ուղեկցող թուրք զինվորների հետապնդումից: Չցանկանալով թույլ տալ, որ իր հարսը դառնա անօրենների զգայական հաճույքի առարկան, Ջավոն՝ առնական արարքների ընդունակ այդ համարձակ կինը, բռնում է նավակի եզրից և նետվում լիճը: Նավակը շուտ է գալիս: Թուրք զինվորները, ինքն էլ հարսի հետ խեղդվում են ջրերի խորքում: Պատմվածքն ավարտվում է կրկին Վաճա լճի և շրջակայքի գեղանկար պատկերով, որին, ընդհանրացում կատարելով, հեղինակը հակադրում է մարդուն՝ բնության ներդաշնակության մեջ հանցագործությամբ, շահատակություններով կյանքը տակնուվրա անելու իր սովորությամբ: «Դարծյալ աստղերը պլպլում էին ծովի մեջ, դարծյալ լեռները իրենց խռոչե կույր աչքերով դիտում էին ծովի և երկնքի խաղը, բնության հմայիչ ներդաշնակության մեջ:

Մարդն էր միայն մի հանցավոր շփոթ առաջ բերում այդ բոլորի մեջ. նա՝ էր իր ոճիրով պղծում երկրի երեսը:

Եվ երկիրը կամաչեր երկնքից, եթե խավարը չծածկեր նրա դեմքը...»², - գրում է հեղինակը: Սակայն նկատենք, որ Ահարոնյանը թեև չափազանց լայն ընդհանրացում է կատարում՝ մեղադրելով ողջ մարդկությանը, բայցևայնպես ակնհայտ էր, որ այս դեպքում դատապարտվում էին տեղաբնիկ արևմտահայության կյանքում քառսի նախապատճառ հանդիսացող, հայկական գյուղերում պետական մակարդակով թալան կազմակերպող թուրք մեղսագործները: Ակներև էր նաև այն, որ գեղջկուհի Ջավոն յուրայինների բնականոն կյանքը խաթարած թուրքերի դեմ անօրինակ պատվախնդրությամբ է դիմում հերոսական անձնագոհության, անհայտության մեջ կատարում հայդուկային պայքարին արժանավայել սխրանք:

Բանական արարածի արարքներն օբյեկտիվորեն անբանական բնության հետ հակադրամիասնության մեջ դիտարկելով՝ իր և՛ այս, և՛ մյուս համանման գեղարվեստական կառույց ունեցող գործերում Ահարոնյանը մարդուն սբափվելու, տիեզերական կեցության մեջ իր բանականության հումանիստական առաքելությունն արժեքազրկելու ճանապարհից ետ կանգնեցնելու ահազանգն էր հնչեցնում:

«Յագրեի»/1905/ պատմվածքը նվիրված է Անդրանիկ Օզանյանին /ունի «Նվեր Անդրանիկին» ընծայական/: Ինչպես հետագայում գրողն է վկայում, պատմվածքի համար առաջը է ծառայել ճանաչված հայդուկապետի պատմածը սասունցի մի կնոջ մասին: Վավերական իրողություններն ու մարդիկ գեղարվեստական հղացքի մեջ վերածվել են Սասունի հերոսամարտի մի դրվագի նկարեն պատումի բաղադրիչներ: Այստեղ թուրքական բանակների հետ տեղի ունեցած անհավասար մարտերում ակներև է դրսևորվել սասունի խիզախ ժողովրդի անկոտրում կամքն ու հպարտ, հերոսական ոգին: Պատմվածքը մասամբ դիմանկարային է: Յագրեի՝ իբրև սասունցի հասարակ գեղջկուհու կերպարը ստեղծվել է օբյեկտիվ ու սուբյեկտիվ կողմերի ինքնատիպ դրսևորումներով: Նրա՝ կանացի ձևերից գրեթե զուրկ արտաքինը, անծնական ծախողված կյանքը /երեք անգամ ամուսնացել էր, երեք անգամ այրիացել և զավակներ չէր ունեցել/ զուգակցված են նրա հերոսական բնավորության հետ: Ոչինչ չէր ընկճել նրա մեջ բռնության դեմ ըմբոստանալու հոգեկան կորովն ու խիզախությունը: Առնական ձևեր ունեցող, կատակասեր այս կինը «Սասունի ռազմիկ, ալեծուփ կյանքին միշտ մասնակցում էր տղամարդի պես»/173/: Այս վերջին համգամանքի շնորհիվ՝ նա ճանաչման էր արժանացել ոչ միայն իրենց Գոմեր գյուղում, այլև ողջ Սասունում: Երկրամասի վրա թշնամու հաճախակի հարձակումների շրջանում իր համարձակությամբ, գործունյա խառնվածքով աչքի ընկնելով՝ նա տարբերվում էր «Ազատության ճանապարհի» մյուս պատմվածքների /«էլ մի աղոթիր», «Անր ճանապարհը», «Կռվի դաշտում», «Զավոն»/ հերոսուհիներից: Նույնիսկ կարելի է ասել, որ Յագրեն իր տեսակի մեջ հայ նոր գրականության ինքնատիպ հերոսուհիներից է, մասնավորապես, իբրև սասունի ինքնապաշտպանական մարտերի շարքային, իր ուրույն դերը կատարող մասնակից: Իսկ այդ դերը, պայքարի տարերային ընթացքի մեջ նա ինքն էր իրեն հատկացրել: Իր հերոսուհու մտածողությունն ու արարքները բնութագրելու առումով հատկանշական է այն, թե գրողն ինչպես է ներկայացնում սասունցիների կյանքի ու պայքարի մասին նրա պատկերացումները: «Նա, - գրում է Ահարոնյանը, - գիտեր, որ Սասունը միշտ պետք է կռվի, երբ թուրք ու քյուրդ հրոսակներ ոտք կոխեն նրա սահմանները, որովհետև Ծիրանակատարը, Ընկուզնական ու Ֆռֆռ քարը հարամիների տեղ չեն. երկրորդ՝ կռվելիս պետք է

շտապով լեռը քաշվել և երրորդ՝ միշտ պետք է հետևից գյուղերը կրակ տալ, որ թշնամին ապաստան ու պաշար չգտնի:

Եվ Յագրեն կռիվների ժամանակ միշտ ինքն էր կրակ տալիս Գոմեր գյուղը, սկսելով իր սեփական խոճթից: Այս էր պատճառը, որ նա փոխանակ ասելու, թե Աստուհի վրա չորս անգամ արշավանք է եղել, հպարտությամբ բացականչում էր.

- Էսա ձեռներովս չորս խետ վառեր եմ Գոմերը: Յերոսական ու չարաբաստիկ 95 թվին ռես Գրգոյի հետ էր մտնել վեր կացել, ասում էր ինքը, իսկ Սուշում սասունցի ուրիշ կանանց հետ թյուրք ոստիկանների գլխին առաջին քարը նա էր նետել, այդ փաստ էր»: /174/: Յագրեին անհատականացնելիս նրա ներքին հետաքրքրությունների մեջ առաջին պլան է մղվում հատկապես ջերմ սերը ժողովրդի մեջ ճանաչման արժանացած հայդուկ-հերոսների՝ Սերոբի, Մուրադի և Անդրանիկի հանդեպ: Նա երազում էր տեսնել «սարերի ասլանին»՝ Անդրանիկին: Այդ հանդիպումը տեղի է ունենում Գոմերի վրա թուրքական բանակի հերթական հարձակման ժամանակ: Այստեղ մի անգամ ևս /և վերջին անգամ/ դրսևորվում է սասունցի այս կնոջ հերոսական բնավորությունը: Գյուղից բնակչության հեռանալուց հետո Յագրեն կրկին այրում է տները, իսկ վերջին պահին, կյանքը վտանգի ենթարկելով, հրդեհում է քահանայի տունը: Սասունցիների ու թուրքերի միջև մարտն սկսվելիս նա մյուս կանանց հետ չի բարձրանում լեռները, մնում է կռվող տղամարդկանց կողքին: Այստեղ էլ զոհվում է Յագրեն այն պահին, երբ առանց ճանաչելու փորձում է օգնել նրան, ում երկար ժամակ ցանկանում էր հանդիպել՝ «սարերի ասլան» Անդրանիկին:

Պատմվածքում Անդրանիկը հպանցիկ է հայտնվում, թուրքերի հետ զինված ընդհարումից առաջ ներկայանալով նախ՝ զուսպ հավասարակշռվածությամբ, ապա՝ ծանր վիրավորված Յագրեի նկատմամբ սրտացավ վերաբերմունքով: Մարտերում կռվված հայդուկապետը արտասվում է՝ մահվանից առաջ իր սիրելի հերոսին ճանաչած այդ խիզախ, անխոնջ կնոջ զոհվելու պատճառով: Տվյալ պահին Անդրանիկի զգացմունքների դրսևորումը ցուցադրելով՝ գրողն ընդգծում էր հերոսի հոգու նրբազգացությունն ու խորությունը: Առաջին անգամ ստեղծելով Անդրանիկի գեղարվեստական կերպարը՝ Ահարոնյանը կարևոր էր համարում տեսանելի դարձնել նրա՝ իբրև ճանաչված հայդուկների առաջնորդի բնավորության երկու էական կողմերը՝ թշնամու դեմ կռվելիս հաստատականություն դրսևորելու, իսկ յուրայինի հանդեպ կարեկից լինելու ունակությունները: Նրա կերպարով համալրվում, հարստանում է հայդուկների գրական դիմանկարաշարը, հայտաբերվում հայդուկապետին բնորոշ նոր գծեր:

Յագրեի կերպարը թերևս խիստ բացառիկ և նույնիսկ անհասկանալի կարող էր մնալ, եթե հեղինակը մասսայական տեսարանով չներկայացներ գյուղի ողջ բնակչության պահվածքն ու վերաբերմունքը՝ ստրկացնելու, կոտորելու, խաղաղ օջախները կողոպտելու եկած թուրքական բանակ կռվող

ոճրագործների ոհմակի հանդեպ: Սասունցիների ինքնաբուխ ըմբոստությունը, իրենց ճնշողներին չհնազանդվելու հաստատակամությունն ու ազատասիրությունը պատկերված է ոչ միայն ինքնապաշտպանական մարտի տեսարանով, այլև դեպի լեռնագագաթները բարձրացող կանանց, ծեփերի ու երեխաների խմբի նկարեն, մոնումենտալ գեղակերտմամբ: «Եվ ո՛չ մի տրտունջ ծեփերի շրթունքներից, որոնք գուցե վերջին անգամն էին թողնում հինավուրց օջախը, որի հետ կապված էին այնքան հիշողություններ. և ոչ մի կաթիլ արցունք կանանց աչքերից, որոնք այնքան տարիների տնտեսությունը ծգում էին թշնամուն և նրա հետ միասին գուցե և իրանց անուսինների և եղբայրների կյանքը, անգամ փոքրիկները ո՛չ մի ծիչ չէին արծակում, նրանք մոտում էին, կպել էին մայրերի փեշերին և դողողալով քաշվում էին դեպի լեռների ծյունոտ կատարները եղնիկների ծագերի պես:

Լուռ էին. և այդ սքանչելի լռությունը ծայրագույն վտանգի ժամանակ՝ հպարտ ու խորհրդավոր արհամարհանքն էր, որ լեռների այս քաջերի զավակները չպարտում էին բռնության ճակատին: Թափորն այն աստիճան լուրջ էր, և դեմքերն այնքան երկյուղած, որ կարծես նրանք ուխտի էին գնում ազատության ոգուն, որ թառել էր անմատչելի կատարներին»/175-176/: Ռոմանտիկ ներշնչանքով ու հերոսականի հաստատման գաղափարամիտումով պատկերված տեսարանը և՛ հուզիչ է, և՛ առնականություն ու հպարտություն ներարկող:

Ազգային կյանքի կենսոլորտի մեջ երեխաների ճակատագիրը սովորաբար անխուսափելիորեն նմանվում է մեծահասակների ճակատագրին: Իսկ ինքնապաշտպանական մարտերում ստանձնած, իրենց տարիքին անհարիր դերակատարության պատճառով՝ նրանց մահը դառնում է եզակիորեն սրտառուչ, սրտակեղեք, անամոք վիշտ: Բացի այս, «Վազրիկ» պատմվածքում գրողը հայդուկային պայքարի մեջ հայտնաբերում և հաստատում է նաև այն գաղափարը, ըստ որի՝ հանուն երեխաների մղվող զուպարն ընթանում է ապագայում ազգի գեոտիպի վերընծյուղումն ապահովելու համար: Սրտաճնշիկ, սակայն նաև հպարտության զգացումով ես ընթերցում չարաճճի ու համարձակ պատանի Վազրիկի, այդ «Վանի Գավրոշի» կարճատև կյանքի պատումը: Այն առավել հավաստի լինելու համար ներկայացված է իրադարձության մասնակցի կողմից: Պատմվածքը նվիրված է նշանավոր հայդուկապետ Նիկոլ Դումանին /ունի «Նվեր Դումանին» ընծայական/: Չի բացառվում, որ վերջինս էլ պատմել է Ահարոնյանին Վազրիկի մասին, իսկ պատմվածքում էլ, հեղինակի հղացմամբ, դարձել պատմող՝ ապահովելով պատումի վավերականության պատրանքը: Դրան նպաստում է նաև հայդուկապետ Վազգենի մասին ակնարկությունը: Իսկ դեպքը՝ որպես արտաբնագրային իրողություն, ամենայն հավանականությամբ տեղի է ունեցել Վանի 1904 թ ինքնապաշտպանական մարտերի ժամանակ: Այս ամենի շնորհիվ՝ նաև գեղարվեստական ակնարկի տպավորություն է թողնում

այս գործը, ուր կարևորվել է, սակայն, թուրքական բանակի ու մի բուռ հայդուկների մղած անհավասար ազատամարտի առաջ բերած ծանր տազնապն ու ութինը տարեկան պատանու ականա մասնակցությունը:

Երկի պատկերային համակարգի կենտրոնում, ինչ խոսք, Վազրիկն է: Պատանու կերպարը գեղակերտվել է նրա տարիքին բնորոշ թե ընդհանուր, թե ինքնատիպ կողմերով: Երեխայական չար կատակներ անելու ու չարածիժությունների հակված լինելով՝ նա վարժվել էր թաղի երեխաների մեջ կռիվներ սարքելու գործում: Ոչ միայն կովազան էր, նախածեռնող, այլև իր հակառակորդի հանդեպ մանկամիտ վրիժառությանը էր լցված: «Նա մշտական պայքարի, անվերջ կռիվների մեջ էր,- գրում է հեղինակը:- Եվ բոլոր այդ կռիվների, բոլոր հալածանքների պատճառը միշտ ինքն էր, Վազրիկը: Ոչ ոք քարերով նրա պես շեշտակի չէր հարվածում կատուներին, շներին, հավերին, փողոցներին պատերից բաշ ընկած խնձորենիների պտուղներին...

Եթե որևէ չարածի խաղի համար նրան վիրավորում էր մի հասակավոր, Վազրիկը հատուցանում էր իր ուժեղ թշնամու փոքրահասակ եղբորը կամ որդուն»/166/: Բայց ահա Վանում ծավալված կռիվների ժամանակ այս աշխույժ ու ճարպիկ պատանին յուրովի լրջանում է և իր տեղը գտնում մեծահասակների ձեռնարկած վտանգավոր «խաղի» մեջ: Նա դառնում է սուրհանդակ հայդուկապետ Վազգենի և պատմողի միջև: Իրեն տրված հանձնարարությունը կատարում է պատասխանատվության, հիրավի, բարձր զգացումով, պատանուն բնորոշ միամիտ անմիջականությամբ ու պարզամիտ լրջությամբ: Այսպես՝ նրան պատվիրել էին թղթերը հանձնել պատմողին, երբ տանը ոչ ոք չէր լինի: «Փոքրիկ բանբերը ամենայն օր, նույն ժամերին, նույն ձևով ներս էր մտնում, կուրծքը միշտ խնամքով կոճկած, միշտ զգույշ ու լուրջ: Տանեցիներից մենք գաղտնիք չունեինք, բայց Վազրիկը մինչև վերջը համառում էր իր ծայրահեղ զգուշության մեջ և նրանց ներկայությամբ չէր համաձայնում կուրծքը բանալ: Նրա այդ սիրուն քմահաճույքը կատարած լինելու համար իմ խնդրով տանտիկինը իր փոքրիկի հետ ունէ պատրվակով դուրս էր գնում, հենց որ Վազրիկը հայտնվում էր: Ծերունին շատ լավ չէր տեսնում, այդ լավ գիտեր Վազրիկը և նրանից չէր քաշվում, իրեն բոլորովին ապահով զգալով՝ նա շտապով մոտենում էր ինձ, չոքում էր առաջիս և կամացուկ կրկնում իր սովորական նախադասությունը, ցույց տալով կուրծքը.

• Զակի՛ր, էսա տեղ բան կա:

Թղթերը հանում էի, և նա կրկին անհայտանում էր, կրծքի վրա փոխադարձապես տանելով իմ նամակները՝ Վազգենին ուղղած»/169-170/:

Մի օր էլ հանձնարարությունը կատարելիս թշնամու ռմբահարվածի պայթյունից զոհվում է Վազրիկը՝ «այդ արիասիրտ, դյուրական մանուկը, որ ոչնչից չէր վախենում»: Քաջարի պատանու մահը անագորույն թշնամու դեմ մի

նոր մոլեգնությամբ կռվելու է մղում նրան ճանաչող հայդուկներին: «Բոլոր վազրիկների անբիծ արյան սիրուն՝ կռիվ էր պետք: Եվ կռիվն սկսվեց»/171/: Այս տողերով է պատմվածքն ավարտում հեղինակը:

Այսպիսով «Ջավոն», «Հագրեն», «Վազրիկ» պատմվածքները ևս գտնվում են «Ազատության ճանապարհին» ժողովածուի գաղափարագեղարվեստական գերխնդիրների ուղեծրում: Արտաբնագրային գաղափարական պաթոսը պատմվածքներում փոխակերպվել է հմտորեն իրականացված գեղարվեստական հորինվածքների: Դրանք իրենց ամբողջության մեջ ակնառու են դարձնում այն իրողությունը, որ հայդուկային պայքարը միայն դրսից՝ եվրոպական երկրներում իրենց կենտրոններն ունեցող ազգային կուսակցությունների կողմից ներմուծված գաղափարների ու հրահրման հետևանք չէր: Այն Օսմանյան թուրքիայի տիրապետության խիստ ծանր ու բարդ պայմաններում գոյատևող արևմտահայության կենսական շահերն արտահայտող շարժում էր, որին այս կամ այն կերպ մասնակցում էին նույնիսկ կանայք ու երեխաները:

Այստեղ արժի նկատել նաև հետևյալը, որ խորհրդային տարիներին հայկական դպրոցներում մեր աշակերտները հնարավորություն չունեցան հանելու թուրքական «Գիքորի» հետ կարդալու նաև Ա.Ահարոնյանի «Վազրիկը»: Մինչդեռ վերջինս ավելի կընդլայներ նրանց պատերազմների շրջանակը արևմտահայության ազատագրական պայքարի, ինչպես նաև հայդուկային կռիվներին յուրովի մասնակցած, իրենց հասակակից, պատանի հերոս կոչվելու արժանի Վազրիկի մասին: Նրա կերպարը հետաքրքիր, ոգևորիչ և ուսանելի կարող է լինել շատերի համար:

Բացի այս, Ա.Ահարոնյանի «Ազատության ճանապարհին» ժողովածուն խորհրդային տարիներին, հանրապի, ըստ արժանվույն չի գնահատվել նաև մեր գրականագիտության կողմից: Մինչդեռ նրանում ընդգրկված են գեղարվեստորեն լիարժեք ստեղծագործություններ, որոնց շնորհիվ գիրքն արժանի է հիշատակվելու արևմտահայ ու արևելահայ մի շարք գրողների /ինչպես, օրինակ՝ Գ.Ջոհրապի, Ռ.Ջարդարյանի, Ստ.Ջորյանի, Ա.Բակունցի և այլն/ համրահայտ պատմվածքների ու նովելների ժողովածուների կողքին: Այդ են վկայում նաև վերլուծված պատմվածքները:

ԳՐԱԿԱՆՈՒԹՅՈՒՆ

1.Хализев В.Е., Теория литературы, М., Высшая школа, 2004, с. 76:

2.Ահարոնյան Ա., Երկերի ժողովածու, Բոստոն, հ. 5, 1948, էջ 81: Այս հատորից մյուս մեջերումները կատարելիս տեքստում նշել ենք միայն էջը: